

Prescripziuns novas per la chatscha 2012

Da las tractativas da l'ultima sesida da la regenza grischuna

■ (cc) La regenza grischuna ha relaschè las prescripziuns da chatscha 2012. Per ils tschiervs è vegnì fixà in plan da prelevaziun levamain pli aut.

Ils tschiervs han tut en tut in effectiv constant, malgrà ch'igl ha dà en il Grischun dal nord perditas pli grondas durant l'enviern passà tras tschiervs disgraziads. Actualmain vegni quintà cun in effectiv da tschiervs da ca. 14 200 animals. La planisaziun da prelevaziun qualitativa per ils tschiervs, ch'è vegnida introducida

l'onn 2000, è sa cumprovada e vegn cuntinuada. Questa planisaziun garantescha ch'i vegn sajettada la quota necessaria d'animals feminins. Sin basa dal plan da prelevaziun da quest onn ston vegnir sajettads totalmain 4460 tschiervs. En cumparegliaziun cun il plan da prelevaziun da l'onn precedent ston vegnir sajettads quest onn 130 animals dapli. Il plan è adempli sch'igl è vegnids sajettads almain 2230 animals feminins. Sch'ils plans da prelevaziun na vegnan

betg ademplids ha lieu ina chatscha d'atun il november ed il december. Là vegnan ils dumbers da prelevaziun fixads tenor regiun da tschiervs.

Chastis pli severs per tschiervs da curuna

Per sbassar il dumber da schluppettadas fallidas da tschiervs da curuna vegnan relaschadas da nov reglas pli severas. Sche fermes tschiervs da curuna vegnan sajettads culpavlamain na vegn quai betg pli

chastià cun ina multa disciplinara, ma bain da nov denunzià. Uschia duai vegnir cuntanschì che tschiervs fermes vegnan observads pli exactamain.

Er tar ils chavriels ha l'enviern 2011/12, cun sia blera naiv e cun sias temperaturas bassas, reduci mo localmain ils buns effectivs. Per che quests effectivs na creschian betg vinavant vegn il temp da chatscha laschè sco l'onn precedent a 21 dis.

Anc adina difficila da stimar è la situaziun tar ils chamutschs. Ils ultims onns han – ultra dals disturbis pli e pli intensivs en lur spazi da viver ed ultra dals envierns dirs – er malsognas gì consequenzas negativas per quests animals. La tschorvada da chamutschs ha donnegià blers effectivs. Ina strategia prudenta è inditgada er vinavant. La chatscha sin chauras-chamutsch vegn perquai puspè reducida per quatter dis en tut il chantun e limitada en il contingent da trais ed en il contingent supplementar ad in animal feminin per chatschadra u per chatschader.

Ils effectivs da selvaschina manidla sa sviluppan anc adina bain uschia ch'i dovrà en quest regard mo adattaziuns minimalas da las prescripziuns. Da nov dastgan er vegnir sajettadas undatras. Uschia duai vegnir impedi che questa spezia d'animals estra fitgia pe en il Grischun.

Ils termins per la chatscha auta 2012 e 2013 èn fixads. Quest onn dura la chatscha dals 3 fin ils 9 da settember e dals 17 fin ils 30 da settember. Dals 10 fin ils 16 da settember vegn la chatscha auta interrutta. Gia vegnì fixà è il termin da la chatscha auta 2013: Quella ha lieu dals 2 fin e cun ils 8 da settember 2013 e dals 16 fin e cun ils 29 da settember 2013.



La regenza grischuna decretescha chastis pli severs per tschervs da curuna che vegnan sajettads culpavlamain.